

定興縣志卷之十

人物志

粵自燕昭禮士流風所被蔚爲名區秦漢以還代有
英彥唐後境土分隸三縣緊豈無人而文獻無徵良
用興慨金元之際張喬郭解則雲起龍驤儀伯公瑞
則羽儀王國及明而忠孝義俠之風炳宇宙矣康熙
志於明諸人標注鄉里厯代則多未諦今據各書系
籍爲準疑者埒後傳曰與其過而去之母甯過而存
之以諗來者庶幾攷訂而奮興焉

列傳

北齊

祖鴻勳涿郡范陽人也父慎仕魏歷雁門咸陽二郡太守
政有能名卒於金紫光祿大夫贈中書監幽州刺史諡惠
侯鴻勳弱冠與同郡盧文符並爲州主簿僕射臨淮王彧
表薦其文學除奉朝請人曰臨淮舉卿竟不相謝恐非其
宜鴻勳曰爲國舉才臨淮之務祖鴻勳何事從而謝之或
聞而喜曰吾得其人矣後咸陽王徽奏鴻勳爲司徒法曹
參軍事及赴洛徽謂曰臨淮相舉竟不到門今來何也鴻
勳曰今來赴職非爲謝恩轉廷尉正去官歸鄉里齊神武
嘗徵至并州作晉祠記好事者翫其文位至高陽太守在

官清素妻子不免寒餒時議高之齊天保初卒官

北史文苑傳

金

郭濟忠字子正河內村人隗之裔也生而異常不爲娛嬉以兄濟道正隆二年律科登第遂晝夜誦習律令精通亦以五年登第授將仕郎四爲縣令以廉能稱

元

張宏略字仲傑柔第八子也有謀略通經史善騎射嘗從柔鎮杞徙亳乙卯入朝憲宗授金符權順天萬戶從征蜀以其幼賜錦衣令還鎮柔致仕授宏略金虎符順天路管民總管行軍萬戶仍總宣德河南懷孟等路諸軍屯亳者

中統三年李璫反求救於宋將夏貴貴自蘄乘虛北奪亳
滕徐宿邳滄濱七州新蔡符離蘄利津四縣殺守將宏略
率戰船遏之於渦口貴退保蘄宏略發亳軍攻之水陸並
進宋兵焚城宵遁追殺殆盡獲軍資不可計盡復所失地
李璫既誅追問當時與璫通書者獨宏略書皆勸以忠義
事得釋朝廷懲璫叛逆務裁諸侯權以保全之因解宏略
兵職至元三年城大都佐其父爲築宮城總管八年授朝
列大夫同行工部事兼領宿衛親軍儀鸞等局十三年城
成賜內帑金釵瑇瑁卮授中奉大夫淮東道宣慰使十四
年宋廣王昺據閩廣時東海縣儲粟數萬行省檄宏略將

兵二千戍之仍命造船運粟入淮安宏略顧民舟有能載
粟十石者與一石人爭趨之一月而畢十六年遷江西宣
慰使會饒州盜起犯都昌宏略使人直擣其巢穴生縛賊
酋磔於市餘黨潰散頃之以疾歸二十九年見世祖於龍
虎臺賜以酒曰卿年未老謝事何爲特命爲河南行省參
知政事元貞二年卒贈推忠佐理功臣銀青榮祿大夫平
章政事上柱國蔡國公諡忠毅子三人玠瑾炎
元史 炎
字避諱改
寫

張宏範字仲疇柔第九子也善馬槊能詩年二十時兄宏
略爲順天路總管上計壽陽行都留宏範攝府事吏民服

其明決蒙古軍所過肆暴宏範杖遣之入其境無敢犯者
中統三年改行軍總管從親王哈必赤討李璫於濟南宏
範營城西璫出軍突諸將營獨不向宏範宏範築長壘內
伏甲士而外爲壕開東門以待之夜命士卒浚壕益廣璫
不知也明日果擁飛橋來攻未及岸軍陷壕中得跨壕而
上者突入壘門遇伏皆死降兩賊將至元元年授順天路
管民總管佩金虎符二年移守大名未上微服行民間察
所患苦見倉吏收租倍蓰視事首治之民悅歲大水漂沒
廬舍租稅無出宏範輒免之六年授益都淄萊等路行軍
萬戶謀取宋襄陽宏範建言宜城萬山以斷其西柵灌子

灘以絕其東乃移兵戍萬山旣城與將士較射出東門宋師奄至卽擐甲上馬立遣偏將當其前他將攻其後親率二百騎爲長陣前後奮擊宋師潰奔八年築一字城逼襄陽破樊城外郭九年攻樊城拔之襄陽亦下十一年丞相伯顏伐宋宏範爲前鋒宋師潰宏範長驅至建康次瓜州分兵立柵據其要害宋揚州都統姜才以二萬人出楊子橋夾水陣宏範衝之眾潰追至城門斬首萬餘溺死過半十三年台州叛討平之師還授鎮國上將軍江東道宣慰使宋張世傑立廣王昺於海上閩廣響應命宏範往平之陛辭賜錦衣玉帶宏範不受以劔甲爲請帝出武庫劔甲

聽其自擇且諭之曰劒汝之副也不用令者以此處之至揚州選將校水陸二萬分道南征以弟宏正爲先鋒戒之曰選汝驍勇非私汝也軍法重我不敢以私撓公宏正所向克捷進攻三江寨拔之破漳州攻鮑浦寨又拔之由是瀕海郡邑皆降獲宋丞相文天祥於五坡嶺使之拜不屈宏範義之待以賓禮送至京師獲宋禮部侍郎鄧光薦命子珪師事焉十六年正月辛酉次崖山宋軍千餘艘建樓櫓其上隱然堅壁宏範引舟師赴之二月癸未將戰或請先用礮宏範曰火起則舟散不如戰也四分其軍軍其東南北三面自將一軍乘潮而戰豫構戰樓於舟尾以布幙

障之命將士負盾而伏命之曰聞金聲則起飛矢如蝟伏
盾者不動舟將接鳴金撤障弓弩火石交作頃刻并破七
舟宋師大潰宋臣陸秀夫抱其主昷赴水死獲其符璽印
章嶺海悉平磨崖山之陽勒石紀功而還十月入朝賜宴
內殿慰勞甚厚未幾瘴癘疾作帝命尙醫診視敕衛士監
門止雜人毋擾其病病甚沐浴易衣冠扶掖至中庭面闕
再拜退坐命酒作樂與親故別出所賜劔甲付嗣子珪曰
汝父以是立功汝佩服無忘也語畢端坐而卒年四十三
贈平章政事加太師齊國公延祐六年加封淮陽王諡獻
武著有淮陽集

郭宏敬字仲禮父彥成以純謹爲張柔所倚任攝行元帥事宏敬姿美性聰好讀書善騎射柔以女妻之授束鹿長遷易州太守德惠在人改完州易人以善政請復爲易州卒劉因撰墓志銘

張珪字公瑞宏範子少能挽強命中嘗射虎洞其喉至元十六年宏範平廣海宋禮部侍郎鄧光薦將赴水死宏範救而禮之命珪受學焉光薦嘗遺一編書目曰相業語珪曰熟讀此後必賴其用師還道出江淮珪年十六攝管軍萬戶十七年眞拜昭勇大將軍管軍萬戶佩其父虎符治所統軍鎮建康未幾宏範卒喪畢世祖召見親撫之奏曰

臣年幼軍事重聶禎者從臣父祖久歷行陣幸以副臣帝
歎曰求老成自副常見不知出此厚賜而遣之徧及其從
者十九年太平宣徽盜起行省檄珪討之士卒數爲賊敗
卒有殺民家豕而并傷其主者珪曰此軍所以敗也斬其
卒悉平諸盜二十九年入朝命爲樞密副使太傅伊嚕勒
諾延言珪尙少姑試以僉書果可大用請俟他日帝曰不
然是家爲國滅金滅宋盡死力者三世矣而可吝此耶拜
鎮國上將軍江淮行樞密副使大德三年遣珪巡行川陝
問民疾苦罷冗官黜貪吏還擢江南行御史臺侍御史換
文階中奉大夫遷陝西肅政廉訪使劾罷郡長吏以下三

十餘人府史胥徒數百徵贓巨萬計珪得監司奸利事將發之事干行省有內不自安者賂遣近臣妄言珪有厭勝事且沮鹽法帝遣官雜治之得行省大小吏及鹽官欺罔狀皆伏罪拜僉樞密院事入見賜濟遜冠服侍宴又命買宅以賜辭不受拜江南行臺御史中丞因上疏極言天人之際災異之故其目有修德行廣言路進君子退小人信賞必罰減冗官節浮費以法祖宗成憲累數百言劾大官之不法及近侍之熒惑者不報遂謝病歸久之拜陝西行臺中丞不赴武宗卽位召拜太子諭德未數日拜賓客復拜詹事辭不就尙書省立中外洵洵中丞久闕仁宗時在

東宮曰必欲得真中丞惟張珪可卽日召拜至大四年仁宗將卽位廷臣用皇太后旨行大禮於隆福宮法駕已陳珪言當御大明殿御史大夫止之曰議已定雖百奏無益珪曰未始一奏詎知無益入奏帝悟移仗大明旣卽位賜濟遜衣二十襲金帶一帝嘗親解衣賜珪明日復召謂之曰朕欲賜卿寶玉非卿所欲以悅拭面額納諸珪懷曰朕澤之所存朕心之所存也皇慶元年拜榮祿大夫樞密副使徽政院使實勒們請以洪城軍隸興聖宮而已領之以上旨移文樞密院眾恐懼承命珪固不署事遂不行延祐二年拜中書平章政事請減煩冗還有司以清政務得專

修宰相之職帝從之著爲令教坊使曹耀珠拜禮部尙書
珪曰伶人爲宗伯何以示後世力諫止之皇太后以中書
右丞相特們德爾爲太師萬戶布色參知行省政事珪曰
太師論道經邦特們德爾非其人布色無功不得爲外執
政車駕度居庸實勒們傳皇太后旨召珪切責杖之珪創
甚輿歸京師明日遂出國門珪子景元掌符璽至是以父
病篤告歸帝驚曰卿別時卿父無病景元頓首涕泣不敢
言帝不懌遣和卓往賜之酒遂拜大司徒謝病家居繼丁
母憂廬墓寢苦啜粥者三年至治二年英宗召見於易水
上曰四世舊臣朕將畀卿以政珪辭歸遣上臣設醴丞相

拜珠問珪曰宰相之體何先珪曰先於格君心莫急於廣言路是年冬起爲集賢大學士先是特們德爾旣復爲丞相以私怨殺平章蕭拜珠御史中丞楊多爾濟上都留守賀巴延大小之臣不能自保會地震風烈敕廷臣集議弭災之道珪抗言於坐曰弭災當究其所以致災者漢殺孝婦三年不雨蕭楊賀冤死非致沴之端乎死者固不可復生而情義猶可昭白毋使朝廷終失之也又拜中書平章政事三年八月御史大夫特克實旣行弑夜入都門坐中書堂矯制奪執符印特們德爾子索諾木議遠流珪曰於法強盜不分首從發冢傷尸者亦死索諾木從弑逆親斫

丞相拜珠臂乃欲活之耶遂伏誅盜竊仁廟神主時參知政事瑪喇勒兼領太常禮儀使當遷左丞珪曰以參政遷右丞姑曰敘進而太常奉宗祏不謹當得罪而反遷官何以謝在天之靈命遂不下泰定元年六月車駕在上都帝以災異詔百官集議珪乃與樞密院御史臺翰林集賢兩院官極論當世得失與左右司員外郎宋文瓚詣上都奏之帝不從珪復進曰臣聞日食修德月食修刑應天以實不以文動民以行不以言刑政失平故天象應之惟陛下矜察允臣等議乞悉行之帝終不能從未幾珪病增劇有詔常見免拜跪賜小車得乘至殿門下帝始開經筵令珪